

Nunat Avannarliit Killiit Siunnersuisooqatigiiffiata aalajangersagaa nr. 4/2009 Inatsisartunit taparserneqarnissaa pillugu Inatsisartut aalajangiiffisassaattut siunnersuut, aalajangersagaaq ima oqaasertaqarpoq:

Nunani avannarlerni killerni ungasianit ilinniartitsineq pillugu pisortatigoornerusumik suleqatigiinnermik misilittagaqarfiusussamik tunngavissiisumillu misiligutitut suliniummik aallartitseqqullugit Islandimi, Savalimmiuni aammalu Kalaallit Nunaanni naalakkersuisut Nunat Avannarliit Killiit Siunnersuisooqatigiiffiannit kaammattorneqarput.

(Josef Motzfeldt, aallartitat siulittaasuut)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerinnineq

Siunnersuuteqartoq Nunat Avannarliit Killiit kaammattuutaannik ingerlatseqqinneranut Naalakkersuisut qutsavigaat.

Ilisimatusarfimmi ungasianiit ilinniartitsinerup atorneqarnerulernissaa pillugu Justus Hansen-ip, Demokraatit, 2010-mi upernaakkut ataatsimiinnermi siunnersuutaanut (UPA-2010/42) nangitsissutitut siunnersuutigineqartoq Naalakkersuisut nuannaarutigaat. Taamani siunnersuutigineqartoq partiit tamarmik isumaqataaffigaat.

Taamani periarfissaq Ilisimatusarfimmit isumaqataaffigineqarpoq. Neqerooruteqartunit allanit ungasianit ilinniartitaanermik iluaquteqarnissaaq aammali ungasinnerusoq eqqarsaatigalugu ungasianit ilinniartitsinissamik nammineq neqerooruteqarnissamut periarfissat eqqarsaatigalugit. Taamaattorli Ilisimatusarfimmi ungasianit ilinniartitsinermik ineriartortitsinermut atatillugu internetimi atuinerlut tunngatillugu nangaassuteqartoqarpoq.

Ataatsimut isigalugu Naalakkersuisut isumaqarput nunani eqqaamiorisatsinni suliassaaq tamanna qanoq isumagineqarsimanersoq paasissallugu soqutiginarluinnartoq. Tamakkunani internet-imut atassutsit akikinnerujussuunerat pissutaalluni periarfissagissaarnerujussuusimapput, tamatumalu saniatigut ukiuni arlalinni uagutsinnit sukkarnerujussuarmik attaveqareersimallutik. Taamaattumik maani ungasianit ilinniartitsinermik atuilersitsiniarneq pillugu suleqqinnissatsinni atorsinnaasatsinnik misilittagarpassuaqalersimassapput. Tamanna ilinniartitaanernut tunngasunut attuumassutilinnut tamanut atuuppoq.

Kalaallit Nunaata peqataanerata aningaasaqarnikkut kingunerisassaanut tunngatillugu oqaatigineqarsinnaavoq misiligutitut suliniummik aallartitsinermi aningaasartuutit annertunngitsussatut naatsorsuutigineqarmata taakkulu kontukku 40.94.15-ikkut, Nunani Avannarlerni Killerni suleqatigiinneq, aningaasalersorneqarsinnaassallutik.

Sullinniakkanummi ilaapput piginnaasaqarnerulersissallugit pingaarutilerujussuutut isigisavut – tassalu ilinniartitsisut. Pineqartumi tamatumani piginnaasaqarnerulersitsiniarnikkut ilinniartitsisut IT-kkut piginnaasaat atuartitsinikkullu

piginnaasaat pitsanngorsarneqarsinnaapput, atuarfeqarnermut tunngasunut tamanut iluaqutaasumik. Taamaaliornikkut ilinniartitsisut piginnaasaqarnerulersinneqarnerisigut ungasinnerusoq eqqarsaatigalugu atuarfeqarnermut tunngasuni ungasianit ilinniartitsinermik atuinissaq piviusorsiornerujussuannngorsinnaavoq.

Naalakkersuisut matumuuna siunnersuutip akuerineqarnissaa inassutigissavaat.